

**ԺՈՂՈՎՐԴԱԿԱՆ ՏԵՂԱՇԱՐԺԵՐԸ ԿԱՐՍԻ ՆԱՀԱՆԳԻ
ԿԱՂՉՎԱՆ ԳԱՎԱՌՈՒՄ**

(17-րդ դար -19-րդ դարի առաջին երեսնամյակ)

16-րդ դարի առաջին կեսին Արևմտյան Հայաստանի վերջնական նվաճման հետ մեկտեղ, օսմանյան թուրքերը ձեռնամուխ եղան մոր վարչակարգերի ներդրմանը: Տերության տարածքը տրոհվեց վարչատարածքային մեծ ու փոքր միավորների: Դրանցից խոշորագույնները կոչվում էին էյալեթներ (հետագայում՝ վիլայեթներ, հայկական աղբյուներում՝ նահանգ): Նահանգները տրոհվում էին սանջակների (գավառ), կազաների (գավառակ) ու նահիեների (գյուղախումբ): 16-րդ դ. Արևմտյան Հայաստանում ձևավորված էյալեթներն էին Էրզրումը (Կարին), Վանը, Չղրը (Ախալցխա), Կարսը, Դիարբեքիրը և Սեբաստիան: Կարսի նահանգը, որն ընդգրկում էր երբեմնի Սեփ Հայքի Այրարատ աշխարհի Վանանդ, Շիրակ (արևմտյան հատվածը), Արշարունիք, Գաբեղյանք գավառները, հյուսիսից սահմանակից էր Ախալցխայի, արևմուտքից՝ Էրզրումի նահանգներին, հարավից՝ Բայազետի լիվա-փաշայությանը, արևելքից՝ պարսկահպատակ Արևելյան Շիրակին: Այն ձևավորվել է 16-րդ դ. վերջին քառորդին և 16-18-րդ դարերի ընթացքում ունեցել է 5-12 գավառ: 19-րդ դարի սկզբին բաժանվել է 6 գավառի՝ Կարս կամ Թախտին, Կեչվան, Շորագյալ, Զարիշատ, Կաղզվան և Խոջվան:¹ Վերջին գավառը, որ զբաղեցրել է խիստ սահմանափակ տարածք (ըստ Ինժինյանի՝ նշանավոր Ղոշավանք-Հոռոմոսի շրջակայքը), դարի առաջին քառորդի ընթացքում վերացվել է և միացվել Շորագյալին: Ուստի, ռուսական

¹ Ինժինեան Ղ., Աշխարհագրութիւն չորից մասանց աշխարհի, հ. Ա, Վենետիկ, 1806, էջ 119:

պաշտոնական աղբյուրներում 1828-1829 թթ. պատերազմի նախօրյակին հանդիպում ենք միայն 5 գավառի:²

Կաղզվանի գավառը, որը համապատասխանում էր պատմական Այրարատ աշխարհի Գաբեղյանք գավառի մի մասին և Արշարունիքին /Երասխաձոր/ և այժմ զբաղեցնում էր նահանգի հարավային հատվածը, հիշվում էր դեռ 16-րդ դարի վերջից: Գտնվում էր նույն փաշայության Կեչվան ու Շորագյալ, երգրունի նահանգի Ստորին Բասեն ու Ալաշկերտ և Երևանի խանության Սուրմալու գավառների միջև: Վերջինիս հետ հարավ- արևելյան մասում անջրպետ էին Սև (Կարադաղի) լեռները, որին զուգահեռ հոսում է Արաքսը, իսկ Սուրմալուի հյուսիս-արևմտյան մասի հետ՝ Դայկական պարն է, որի երկայնքով հոսում էր Զաղարան գետը: Բասենից բաժանվում էր Սողանլուղի լեռներով և նրա շարունակությունը հանդիսացող լեռնաքաղուկներով: Շորագյալի գավառից Կաղզվանը տրոհվում էր սահմանակից ջրբաժան լեռնաքաղուկներով: Կաղզվանը Բայազետի լիվա- փաշայության Ալաշկերտ գավառից սահմանազատվում էր Դայկական պար լեռնահամակարգի մեջ մտնող Շատին /Զատին/, Շախյու, Բոզ-դաղ, սրանից արևելք՝ Դինթո, վերջինց հյուսիս՝ Ընկուզուտ, հարավ-արևելք՝ «խրթնատեսիլն Սամաքար» լեռներով:³ Կաղզվանի գավառի ծայր հարավ-արևմտյան մասում, Արաքսի ծախ ավին թլուրներով շրջապատված Տաղնի⁴, Զանկլի, Ջոնտար լճերն էին:

Գավառի կենտրոնատեղին ու սանջակբեյի նստավայրը Բարդող լեռան ստորոտին ընկած Կաղզվան գյուղաքաղաքն էր:⁵ Այն 17-րդ դարում ուներ 700

² История военных действий в Азиатской Турции в 1828-1829гг., СПб. 1836, ч.1, с.75:

³ Абих Г. Геология Армянского нагорья, Западная часть. Орографическое и геологическое описания. Пятитгорск, 1889. с. 55, Աիշան Ղ., Այրարատ, էջ 49:

⁴ Տաղնին հայտնի է նաև Դագնիս անվ (Карта театра военных действий в 1855г. Малой Азии, (в атласе "Война за Кавказом в 1855., Н.Н. Муравьева. СПб 1877/:

⁵ Մատենադարան, Ձանազան հեղինակների արխիվ, թղթ. 41, վավ.1, թղթ. 42, վավ.2, թղթ.43, վավ. 3:

տուն բնակիչ:⁶ Ղ. Ինճիճյանը 19-րդ դարի սկզբին Կաղզվանում հաշվում է 500 մարդ՝ «մեծի մասին յազգես հայոց»:⁷ 1828 թ. դեկտեմբերի 24-ի վիճակով՝ այնտեղ մնացել էր մինչև 300 բնակիչ⁸: Գավառի վիճակը քիչ բանով էր տարբերվում կենտրոնավայրից: Հստակորեն երևում է, որ օսմանյան տիրապետության ընթացքում կոտորածների, բռնագաղթի ու ազգաձուլման պայմաններում հայ բնակչության թիվը շեշտակիորեն պակասել էր: Արծվուտ լեռան սահմաններում կային բազում լքված և ամայի գյուղեր, որոնք ևս, հավանաբար 17-րդ դարից սկսյալ՝ հայաթափվել էին կամ ամայացել:

Մինչև 1828թ. Կաղզվանի գավառում կար 16 գյուղ՝ բաղկացած 776 տնից: Կարսի փաշայության նվաճումից հետո ռուսական իշխանությունների կատարած մարդահամարի տվյալներով, գավառում հայկական 262 տան դիմաց մահմեդականներն ունեին 514 տուն: Ընդհանուր բնակչությունը կազմում էր 3995 մարդ:⁹ Յուրաքանչյուր գյուղում փաստորեն հաշվվում էր մոտավորապես 50 տուն:

Գավառի առավել նշանավոր հայկական գյուղերից էր Չանկլին: 19-րդ դարի սկզբին այն անցել էր Ալաշկերտի փաշային¹⁰: Գերմանացի ճանապարհորդ Կ. Կոխը, 1843թ. լինելով այս գյուղում, ենթադրում է, որ այնտեղի «բնակիչների մեծ մասը պետք է, որ մահմեդականներ լինեին...»¹¹: Սակայն այդ հարցում Կոխը սխալվում էր. այս գյուղը մինչև 20-րդ դարի առաջին տասնամյակին էլ դեռ շարունակում էր մնալ որպես զուտ հայաբնակ գյուղ: Արաքսի աջ ափին Ղարավանք (Ղաչավանք, Սև վանք) հայաբնակ գյուղն էր՝ Թաթև և Վարոսի (Վարդիհեր) վանքի հարևանությամբ: Այն Ղարավանք անունը ստացել էր եկեղեցիների սև քարից կառուցված լինելու

⁶ Էվլիա Չելեբի. Թուրքական աղբյուրներ, թարգմանությունը, առաջաբանը, ծանոթագրությունները Ա. Խ. Սաֆրաստյանի, հ.գ, ե. , 1967, էջ 119:

⁷ Ինճիճեան Ղ., նշվ. աշխ., էջ 120:

⁸ Մատենադարան, Կաթողիկոսական դիվան, թղթ 58, վավ. 103, թ.1-2, թղթ. 66, վավ. 60, թ.1:

⁹ История военных действий ч.1, СПб., 1836, с. 75:

¹⁰ Ինճիճեան Ղ., նշվ. աշխ., էջ 120:

¹¹ K. Koch, Wanderugen im Oriente während der Jahre 1843 und 1844: Reise im pontischen Gebirge und Türkisch-Armenien, Weimar; 1846, p. 453:

պատճառով Սարգիս Չայկունին Ալաշկերտից Կաղզվան տանող ճանապարհին՝ մինչև Ղարավանք հասնելը, հիշատակում է ևս երկու հայաբնակ գյուղ՝ Զինամեշը և սրանից հյուսիս՝ Ինկլիջեն¹²:

Կաղզվան քաղաքից հարավ Ղզլքիլիսան ու Մանավասն էին: Ղ. Ալիշանը վերջինիս կապակցությամբ գրում է. « որ տայ յիշեցուցանել զգացումն նահապետութեան Որդունեաց և Մանավազեանց»¹³: Գավառի կենտրոնավայրից մոտ 13-կմ հյուսիս-արևելք ընկած էին դեռևս 6-րդ դարից հիշատակվող Խար¹⁴, իսկ նրանից հարավ՝ Ղարաբաղ գյուղերը: Սրանից հարավ-արևելք, Ինջե լճակից արևմուտք ձգվող լեռների խորշում, Քերս կամ Գերս գյուղն էր, որի դիրքը և անունը՝ Գերս-Արտագերս, հուշում էր այս տարածքում միջնադրյան անառիկ Արտագերս ամրոցի գոյությունը: Սրա մերձակայքում պետք է գտնվեր Ջունուքը¹⁵:

1829թ. հոկտեմբերի 29-ին կոմս Ի. Պասկևիչի հրամանով Քերսի գյուղացիների մի մասին գրանցում են Շորապյալի գավառի կառավարիչ Մարտիրոս Վեքիլյանի կազմած «Դավթարում»՝ որպես ռուսական զորքի հետ Արևելյան Չայաստան գաղթելու ենթակաների ու ռուսաց հպատակների: «Բայց, այսուհետև, քանի որ մեք թագավորական դեֆտերն գրուածենք, այն թերիշէն մինչև հիմայ սանի բեկն մեզի հետ ներհակութիւն կանն... խաչահաւաղ էնք... և մանաւանդ ահ և երկիւղ կուտայ մեզ թե համբերեցեք տեսեք թէ յետ քանի մի աւուր ես ձեր գլուխն ինչ կուբերեն... մեզ մէկ իլլած արա մեք այս թուրքի ձեռն չենք կարալ քաշեր, մեզ շօրագեալու վերայ գրէ... դու գիտես մեք էլ քրիստոնեա ենք, մեր հաւատն խաչըն եկեղեցին, և օրենքն ձերն է... այս թուր(ք) մեզ վառել է »:¹⁶ Կաղզվանի Խար, Ղարաբաղ և երկու ուրիշ գյուղեր, վախենալով Սանի բեկից, չեն գրվում «սանջաղի ցուցակներում»:¹⁷

¹² Չայկունի Ս. Նշվ.աշխ. էջ 335:

¹³ Ալիշան Ղ., Այրարատ, էջ 54:

¹⁴ Խար բառը Կյուրեղ Սրապյանն այսպես է ստուգաբանում՝ «Խար՝ հայերեն բառ մի է և կնշանակե տաղ կամ տաղած, բայց կարելի է Քար բառին աղաւաղեալն լինի» (Մատենադարան, Կյուրեղ Սրապյանի արխիվ, թղթ. 81թ. վավ. 222, ք.1):

¹⁵ Մատենադարան, Կաթողիկոսական դիվան, թղթ. 257գ, վավ. 66, ք. 1:

¹⁶ Մատենադարան, Կաթողիկոսական դիվան, թղթ. 257գ, վավ. 84:

¹⁷ Նույն տեղում, վավ. 92:

17-րդ դարում հիշատակվում է նաև Աղջաղալա անունով մի գյուղ, որը հիմնվել է Երվանդակերտի տեղում: Զալալիների բռնություններից վախեցած այս գյուղի բնակիչները, ըստ Առաքել Դավրիժեցու, փախուստի են դիմում: ¹⁸ Այս գյուղը նվաճվում է Երևանի կուսակալ Ամիրզունա խանի կողմից. «պատերազմամբ և աւերածով շրջակայիցն վայրաց և վարելով գիայ»: ¹⁹

Ախուրյանի և Արաքսի խառնման վայրից հյուսիս, Ախուրյանի աջ ափին Դելիմջանն էր, ավելի հյուսիս՝ տարածվում էին բազամաթիվ ավերակ բնակատեղիներ. «երկին բազում աւերակք տանց և փոքրիկ ամրոցի միոյ և մատրան» ²⁰:

Գավառի ժողովրդագրական պատկերը մեծ փոփոխությունների է ենթարկվում դեռ 17-րդ դարի սկզբներից: Շահ Աբասն ըստ Առաքել Դավրիժեցու «գՁորն Կաղզուանու բնաւին» ամայացրեց՝ գաղթեցնելով դեպի Պարսկաստան: ²¹ 1665թ. մայիսին հինգ ֆրանսիացիներ, երգրումից Պարսկաստան անցնելու ճանապարհին, լինում են նաև Կաղզվանում: Նրանցից երկուսի՝ Դե Լալենի և Դե Լա Բուլե Լե Գուզի՝ ֆրանսիական թագավորին ուղղված մայիսի 20-ի նամակում, ի թիվս Հայաստանի տարբեր շրջանների, տրվում է Կաղզվանի նկարագիրը: Հասան-Կալայից «...այն կողմ, մինչև պարսկական հողերը, գրում են ֆրանսիացիները, - կարելի է հանդիպել միմիայն անապատների և մի փոքր ավելի մեծ քաղաքի, որը բնակեցված է հայերով: Դա Կաղզվանն է...: Այս երկիրն ամբողջովին ավերված է Շահ Աբասի կողմից, որը այրել ու անմարդաբնակ է դարձրել բոլոր գյուղերը՝ բնակիչներին իր երկիրը տեղափոխելու նպատակով, իսկ մնացած սակավաթիվ մարդիկ, ինչպես նաև բոլոր գաղթեցվածները քրիստոնյաներ են»: ²²

¹⁸ Պատմություն Առաքել վարդապետի Դավրիժեցիոյ էջ 60:

¹⁹ Ալիշան Ղ., Այրարատ, էջ 64:

²⁰ Շախաբունյան Հովհ., Ստագրութիւն կաթողիկէ Էջմիածնի և հինգ գավառաց Այրարատ ի Էջմիածին 1842, էջ 39-40:

²¹ Առաքել Դավրիժեցի, Պատմութիւն Առաքել վարդապետի Դավրիժեցիոյ, Վաղարշապատ, 1884, էջ 38:

²² Զուլայան Մ.Կ., Հայ ժողովրդի պատմության հարցերը ըստ եվրոպացի հեղինակների, գիրք Ա.Քաղաքական պատմություն, Երևան 1990, էջ 284:

Բռնագաղթի դեպքերը կրկնվում են հաջորդ դարում: Ձաքարիա Քանաքեռցու վկայությամբ Թահմազդուլի խանը 1735 թ. գարնանը շարժվում է Կաղզվան և «զամենայն վայրսն գերեաց և աւերեաց»:²³ Նույնի մասին ականատես Աբրահամ Կրետացին պատմում է, որ պարսկական բանակը, պաշարելով Կարսը, Նադիրի հրամանով ուղարկվում է նաև Կաղզվան: «...Յորում գնացեալ քանդեցին գերկիրն,- գրում է պատմիչը,- այրեցին գշիւնւածսն, գերեցին գմարդիկը և զանասունս և բազում աւարաւ դարձան ի բուն բանակն ի Ղարս »:²⁴

Կաղզվանի գավառը մեծապես տուժում է նաև 1820-1823թթ. թուրք-պարսկական պատերազմի ժամանակ: 1822 թ. աշնանը Երևանի Յասան խանի զորքերը ներխուժում են Երասխաձոր և 2000 ծուխ հայերի բռնագաղթեցնում Արարատյան դաշտ, մասնավորապես՝ Սարդարապատ:²⁵ Այդ արշավանքի հետևանքով շատերը գավառից ինքնակամ հեռանում են Գյումրի: Նրանց ունեցվածքն անցնում է տեղի գավառապետ Սանի բեկի ձեռքը:²⁶

Կաղզվանի բնակչությունը մեծ կորուստներ է կրում 1829թ. Բասենից ներխուժած քրդերի հաճախակի հարձակումների հետևանքով: Տեղի բնակչությանը հաջողվում է նրանց հասցնել հակահարված:²⁷ Այս գավառը նոր արհավիրքների է ենթարկվում 1828-1829թթ. ռուս-թուրքական պատերազմի ընթացքում: Կարսից 1829թ. հունիսի 24-ին Էջմիածնի միաբանությանն ուղղված նամակում Սահակ վարդապետ Սաթունյանը կաղզվանցիների ծանր վիճակի մասին հայտնում էր. «...մեր եղեալք հայոց աստ և անդ ցրվեցան և ոճանք ի սղմաղ մտին վասն երկիւղի քրթացու և օսմանցոյց վասն որոյ և մեք

²³ Ձաքարիա Քանաքեռցի, Ձաքարեայ սարկաւազի պատմութիւն, հ.Ա., 1870, ի տպ. Կաթողիկէ Էջմիածնի ի Վաղարշապատ, էջ 71:

²⁴ Աբրահամ Կրետացի, Պատմություն, Ե. 1973, էջ 67:

²⁵ Արարատ, 1889, թիվ 9, էջ 152:

²⁶ Մատենադարան, Կաթողիկոսական դիվան, թղթ. 257գ, վավ. 86:

²⁷ История военных действий в Азиатской Турции в 1828-1829 гг., т. 2, с. 65; Присоединение Восточной Армении к России, СБ. док., т. 2, 1814-1830, Ер., 1978, док. 365:

անճար մնալով եկեալ աստ կամք...»:²⁸

Եվ վերջապէս, գաւառն ու քաղաքը ամենալուրջ էթնոժողովրդագրական փոփոխութիւնների ենթարկվեց 1830թ., երբ ռուսական զինվորական իշխանութիւններն ու կամավորական Մարտիրոս Վեքիլյանի ջոկատը հայութեան զանգվածային գաղթ կազմակերպեցին դեպի Անդրկովկասի Ռուսաստանին անցած շրջաններ:²⁹ Պատահական չէ, որ այդուհետ Կաղզվանն արդեն ներկայանում էր որպէս «շեն անշքացեալ ... և սակաւամարդ»:³⁰ Իսկ Ն.Սարգսյանն այսպէս է ներկայացնում սակավամարդ ու կիսավեր դարձած Կաղզվանի վիճակը. «Արդ Կաղզուան թէպէտ և աւան համարի ի գաւառի աստ, այլ ի հնոց և ի նորոց չունի ինչ արժանանալուս, սակաւաթիւ տունքն ոչ ինչ ընդհատ ի գեղջկականց և շուկայն իբր քսան կրպակօք սահմանիւ նորաշէն եկեղեցին անշուք է և ազգայինք սակաւ, զի բազումք գաղթեցան առ Ռուսս»:³¹

Նման էթնիկ գործընթացները, որոնց հիմնական միտումը հայաթափումն ու ամայացումն էր, հատուկ էին ոչ միայն Կաղզվանին, այլև արևմտահայ գրեթե բոլոր գաւառներին, երևոյթ, որը կազմում էր Արևմտյան Հայաստանի ժողովրդագրական զարգացման հիմնական ուղղությունը օսմանյան դժնդակ տիրապետության ողջ ընթացքում:

²⁸ Մատենադարան, Կաթողիկոսական դիվան, թղթ. 257, վ. 56: Նույնի մասին Ղ.Ալիշանը գրում է. «... այլ ասէին մերձաբնակքն յաիւ եզիտեաց դեգերելոց ի կողմնանսն» (Ալիշան Ղ., Այրարատ, Վենետիկ, 1890, էջ 53):

²⁹ Մատենադարան, Կաթողիկոսական դիվան, թղթ. 66, վավ. 185, ք. 1:

³⁰ Ալիշան Ղ. Տեղագիր Հայոց Մեծաց, Վենետիկ, Ս. Ղազար, 1853, էջ 35:

³¹ Սարգիսեան Ն., Տեղագրութիւնք ի Փոքր եւ ի Մեծ Հայս » Վենետիկ, 1864, էջ 216: Հարկ է նշել, որ հետագայում՝ 1840թ. ընթացքում տեղի ունեցած երկրաշարժերի հետևանքով Կաղզվանը կրկին զրկվեց իր բնակիչների մի մասից (Տե՛ս Հայաստանի և հարակից շրջանների տեղանունների բառարան, հ.2, էջ 908): Սակայն նույնիսկ այդ ժամանակ, ինչպէս հաստատում է Կաղզվան այցելած գերմանացի ճանապարհորդ Կ.Կոխը, քաղաքում հաշվում էր մոտ 100 հայկական տուն (K. Koch, Wanderugen im Oriente während der Jahre 1843 und 1844: Reise im pontischen Gebirge und Türkisch-Armenien, p.453-454: 19-րդ դարի կեսերին Կաղզվանի բնակչության թիվը աճեց և 1855թ. արդեն կազմում էր 800 տուն, որից հայկական էին միայն 150-ը: (ԾցՐՈՉՖաՉ Ժ.Ժ. "ԹՏՆՎՈ ջՈ ԽՈՉՍՈՂՏՎ Զ 1855", հկո 1877, 3.1, ր. 59, 155):